

LOU PROUVENÇAU A L'ESCOLO



DURÈNÇO



N° 5

ABRIÉU 1998

CAMIHE DOURGUIN E CARLE MAURON, FOUNDADOU

ENSIGNADOU

Lindau	3
Quàuqui mot pèr charra de Durènço emé lis escoulan	4
Pichoto istòri de Durènço (entrevisto emé C. Miramont)	5
La Durènço : un rode vivènt espetaclous (J. Michel-Bechet)	7
Escais-noum de vilo, vilage e vilajoun en ribo de Durènço, de Pertus fin qu'au Rose (C. Reyre, E. Moucadel)	12
Quouro Belaud de la Belaudiero cabussè dins Durènço (E. Desiles)	14
Souto Durènço : Frederi Mistral, <i>Nerto</i> (G. Mauron)	21
Lou càrri de Durènço pèr Bremoundó de Tarascoun (E. Moucadel)	27
Un miracle... subre la Durènço : <i>Benoita</i> de G. Waton de Ferry (S. Calamel)	32
Un liame de pouèmo sus Durènço :	
1. F. Peise, <i>À la Durènço</i>	39
2. Michel, <i>La Durènço</i>	40
3. F.-G. Aubert, tros dóu pouèmo <i>À moun acacia</i>	42
4. F. Mistral, <i>Lou Pouèmo dóu Rose</i> , LXXX e XCVII	43
5. R. Coupille, <i>La Durençado</i>	45

PICHOTO ISTÒRI DE DURÈNÇO

Pèr segui lou fiéu di recerco d'aro sus l'istòri de Durènço, avèn rescountra l'autour de la darriero tèsi sus la ribiero, soustengudo à-z-Ais-de-Prouvènço en janvié de 1998 e pancaro estampado¹. S'agis de Cecilo MIRAMONT, qu'a 28 an e qu'ensigno la geougrafio à l'Universita de Prouvènço. Veici lis esplico siéuno, raport i grândis epoco istourico.

Sus lou tèms di Rouman, avèn pas gaire d'entresigne. Tant se pòu qu'aguen pancaro destousca li rode interessant pèr cava, en ribo de Durènço, o qu'aquélis endré abita aguèsson pièi dispareigu, empourta pèr li gròssis aigo o aclapa souto li cremen. Se pènsò pamens que fasié alor, belèu, un pau plus caud, que i' avié mens de "durençado" rabènto : d'aquí un lié mai estré e mai founs, ounte se poudié navega sus de radèu à la desciso (acò 's segur, e durara longo-mai) e, poussible, à la remounto. L'eisèmple di fouio de Riez, dins la vau dóu Coulostre², ensigno bèn que lis ome poudien se teni mai proche que vuei dóu "mitan" de la ribiero. À la finido de l'Antiqueta, lou tèms se refresco, i' a mai d'aigo - n'avèn la provo, mai, pèr li nivèu marca à Riez.

Sus la coumençanço de l'Age Mejan, sian pas mai assabenta. Dóu siècle nouven au siècle voungen, à pau près, es de crèire que lou climat fuguè pulèu tranquile. Mai, à coumta de 1350-1360, li doucumen dis archiéu parlon de "gròssis aigo" mantun còp, ço qu'afourtisson li cerco toucant l'abadié de Séuvo-Cano, ounte se devino de lié de cremen dóu coustat de Durènço. Sabèn d'un biais generau, qu'à la fin dóu siècle quatourgen, touto l'Éuropo aguè mai de fre e mai de plueio.

¹ : *Morphogenèse, activité érosive et détritisme alluvial holocènes dans le bassin de la moyenne Durance*, souto la beilié de Mirèio Provansal, proufessour à l'Universita de Prouvènço.

² : Se saup que lou Coulostre, de-vers Gréus, mesclo sis aigo à-n-aquéli dóu Verdoun, e que lou Verdoun se jito dins la Durènço à Cadaracho.

Lou siècle quingen, pèr lou climat, es un moumen de pausetò. Pièi, au mitan dóu siècle segen, rintran dins ço qu'apellon "lou pichot age glaciàri", que durara fin qu'à la segoundo mita dóu siècle dès-e-nouven. Es l'epoco di durençado espetaclouso, majamen de 1540 à 1610, de 1640 à 1710, de 1750 à 1820, de 1840 à 1880 : d'aquí vèn lou prouvèrbi "Mistrau, Parlamen e Durènço soun li tres flèu de la Prouvènço", e se gardo memòri dis inoundacioun de 1651 coume dóu "grand deluvi prouvençau". De nouta, peréu, que li cercaire an forço mai de doucumen : en basso Durènço (de Mirabèu au Rose), avèn de carto requisto desempièi lou siècle dès-e-vuechen, raport i questioun de raro entre Prouvènço e Coumtat. Fin que vers 1900, Durènço es uno ribiero "trenado", coume se dis, em' uno maire forço larjo, un fube de canau, d'isclò, de graviero mouvedisso, de rode palunous. Acò s'apren, pèr uno bono part, i mountagno d'eilamount que si pendis soun fatura, em' acò lis aigo e li peireto davalon eisa, e la ribiero, gounflo di chavano, rebalo de gravo e de coudoulet en s'espandissènt tant que pòu.

De-vers 1900, *grosso modo*, i' a mens de "gròssis aigo" : dins touto l'Éurope, lou tèms se rescaufo, plòu segound de ritme mai regulié. Em' acò lou courre de la Durènço s'esquicho dins un lié mai estré, d'enterin que, vers li ribo, li "lié minour", qu'avans èron que de coudouliero, vènon d'endré ounte l'aubriho crèis, sènso que lis aigo la derrabon. Fau teni comte, tambèn, de ço que se passo en-mountagno, ounte se planto mai d'aubre, qu'éli arrèston lou regoula dis aigo e di graveto. E, pièi, avau, vers Vau-Cluso e Rose, se fai toujours que mai de levado pèr apara li terro e gagna de champ.

Enfin, desempièi un mié-siècle, li grand barrage e canau, majamen à Serre-Pouñoun, an acaba la mudo - ço qu'empacho pas la Durènço (emai lou Var) d'agué, de tèms en tèms, de crèis subit e viólènt, coume n' i' a nourmalamen dins li ribiero di païs de la Mié-Terrano - ansin la durençado de janvié 1994.